

Vortrag Fasching KCH am
16.02.2026

Geschern ihr Leid, dess sinn kä
Bosse,

hawwisch die Gschicht middem
Chef soim T-Shirt nochemol Revue
passiere losse.

Beim Johresesse vumm Chor in
enere Eck vunn Fraue mit Falde,

hemmer uns iwwer de Chorleider
unnerhalde.

Iwwer soi Shirts mit Uffschrifde
die meischd stellen klar,

dass er de Boss iss, dess is jo ach
wahr.

Unn im Laufe vumm Gspräch hodd
mer sisch donn entschlosse,

dem Gude e besonneres Präsent
zukumme zu losse.

E Shirt war klar, dess muss es soi,

do druf hemmer gedrunge e guud
Gläsel Woi.

Erschd hawwisch gedenkt so e
TShirt iss jo kä Probläm,

do nimmschd e Foddo vumm Chor
unn de dm liffert des Shirt donn
häm.

Doch der Plon iss gonge ziemlich
denewwe,

Hodds doch vumm Chor kä
gscheides Foddo gewwe.

Was mache mer jetzt oje oje,

doch donn hämma kadde e gudi
Idee.

Bei de Somsdachsprob fer unser
Singe im Advent,

war mer uns sicher, dass mer e
subber Foddo schieße kennt.

Doch die Rechnung war erschd mol
uhne unsern Chef gemacht,

hodd der uns doch mit Argusache
stännisch bewacht.

Donn endlich isser ins Erdgeschoss
gonge,

do henn mir Dome mit
Schnabbschiss ogefonge.

Awwer he net long hodds gedauert,

hodder uns schunn widder
uffgelauert.

Dess Vorhawwe is wohl geschlache
fehl,

do draus hodd mer net mache
kenne en Hehl.

En onneri Lösung hodd misse her,

isch sach eisch, dess war gonz
schä schwer.

Donn irchendwonn hodd de Chef
uns gesagt,

dass die Presse mit ihm e
Interview wagt.

Unn außerdem wurd uns in Aussicht
gestellt,

dass uns lernt kenne faschd die
gonz Welt.

Beim Konzert sollt en Fotograf in
die Kerch zu uns kumme,

der vunn uns Hübsche hedd e
Foddo uffgenumme.

Es Problem wär erledischt so
hemmer gehofft,

doch mir henn uns gedeischt, wie
so oft.

Vunn de Empor wollt de Fodograf
uns knipse om Schluss,

a dess wär doch worre de
roinschde Stuss

De Chef hedd mer nur vunn hinne
geseh,

unn die Uffnohm vumm Chor bei
der Entfernung wär worre a net
schee.

Schließlisch war mer gedrillt zu
singe engelsgleich,

Do missen a die Gsichter vumm
Chor wirke zart und weich.

Dess hodd mer alles net wirklich
gebasst,

deshalb hawwisch en Entschluss
gefasst.

Isch hab moin Mut all zomme
genumme,

unn hab Verbindung zum Reporter
Keller uff genumme.

Isch habb ihm de Sachverhalt
näher gebracht,

unn der hodd erschd mol kräfdisch
gelacht.

Dess wär kä Problem so hodder
kommentiert,

unn hodd de Kondakt mit de
Fodografin organisiert.

Mit der hawwisch ausgemacht gonz
iwwerzwerch,

dass se vor de Prob schunn kummt
in die Kerch.

Dass er mit der Sach wurd so
überfalle,

hodd unserm Chef grad gar net
gefalle

Er war stingisch, dess hawwisch
genau gemerkt,

soin Blick hodd misch in moiner
Onohm bestärkt.

Sollt domit unsern Plon schunn
widder kibbe,

a do hedde mer jo erneut gelidde.

Doch pletzlich isch war grad
feschde om Bete,

hodd e großes Paar die Kerch
betrete.

Donn henn die Zwä dess iss jetzt
Fakt,

e fachmännisch Fotoequipment
ausgepackt.

Unsern Diriscent hodd uns denn
Monn donn vorgestellt,

als beschden Chef vunn de gonze
Welt.

Der Monn, der hodd mer glei
richdisch gut gfalle,

unn isch habb mer gedenkt, denn
du isch mer jetzt kralle.

Ihr wissen jo all, dass isch sehr
schüchtern bin,

trotzdem bin isch zu ihm gonge hin.

Isch habb mit ihm iwwer unsern
Plon gebabbelt long,

unn isch hab glei gemerkt, dass ma
denn fer so was Hoimlisches
brauche kann.

Isch habb ihm ubemerkt moi
Kontaktdate gschriwwe,

Ab donn simmer in Kontakt
gebliwwe.

Die Bilder vumm Heiko waren echt
der Hommer,

ma muss sache, fotografiere
konner.

Unsern Chef, getroffe wie en
junge Gott

de Mozart wär vor Neid worre
blass unn donn rot

Unn die Bilder vumm Chor isch
konnts echt net fasse,

die roinschde Stars,

die Honhäfer deten erblasse

So en Gliggsgriff wie de Heiko ihr
Leid,

denn find ma nimmi weit und breit.

Der Plon middem Tshirt dess war
soo glor,

konnt jedzd endlich werre wohr.

En Infokanal uhne de Chef hodd
nadierlich misse bei.

dess hawwisch donn gemacht mol
glei.

Do driwwer sinn unser Abstimmunge
geloffe,

weils Design vumm Shirt war
zunegschd komplett offe.

Die Farb, de Spruch, des Bild,
halt efach viel,

do driwwer hemmer schließlich
misse mache en Deal

Mit Abstimmendinger hemmer
geschriwwe hie unn her,

uff e gemoinsomes Ergebnis kumme
war irchendwonn nimmi schwer.

Dess Shirt hawwisch donn bestellt
im Netz,

dess isch jetzt net nur so e
Gschwätz.

Bin jeden Dach on de Briefkaschde
gerennt,

unn hab gedenkt die henns vapernt.

Awer donn ihr Leid hodds on de
Hausdär gerabbelt,

unn de Briefträger hodd dorum
gezabbelt.

E Päcksche vumm Shirtlabor
hodder gesagt,

a dass der sisch do druff zu gugge
waagt.

Awwer hopp isch war efach froh
unn zufriede,

dass des Shirt war jetzt do fer
unsern Liewe

Es war wirkklisch schä unn gut
gelunge,

so henn de Chor unn isch a
befunne.

Unn isch glaab unsern Dirigent war
ziemlisch berührt,

was der Chor do hod im Schilde
geführt.

Unn vermudlich war ihm jedzd a
klar,

warum die Schausten so sehr
hinner em Chorbild her war.

Unn wemmer mol widder was plonen
fer unsern Chef

Chorbilder sinn do wie aussem
Effe

Helau

